

## **Pita 2** **leta aniwai rabuinama ya** **girumina**

### *Pita na waikaiwama*

<sup>1</sup> Taugu Saemon Pita, Yesu Keriso na apasolma be na taunoyama, uma letanama yà girugirumina taumi tauwai sumaga ḡaromie. Yesu Keriso tauna vutuna tauda dà Mamaituama be dà Tauwai yawasanama, tauna vutuna taukawa didimanidama be matabuda waisumaga teneginama ya utedana. Inam waisumeginama tauna matane ya vere kauana.

<sup>2</sup> Tauna na raukivivere be na subama ḡaromie sibo a maurana, baninama taumi Mamaitua be dà Badama Yesu koya katai kauedi be taudi mate ko miamia tenagana.

### *Mamaitua ya vinemina*

<sup>3</sup> Bada Yesu ya vinedana, aubainama yodi Yesu tè katai kaue be tauna mate tà miamia tenagana, vutuna aubainama rewapana be yawasana matabudi Arue ya utedana, da yodi tauda teneteneginama da didimane tà miana.

<sup>4</sup> Be mate inam rewapanine tauna na saugama dosidima be veredima ya utedana da tokare tà mia nonogana Mamaitua maika. Be inam kedane dobu adi voiama gewegewedima kaite tè gosedina, inam vutudi a kawakawa gewagewadana.

<sup>5</sup> Vutuna aubainama ko raurubu gurata da ami waisumaḡe vere ko voiena. Be vere murine Mamaitua ko katai kauena. <sup>6</sup> Be Mamaitua ko katai kauena murine, tokare ko rabe munaḡemina. Be rabemunaḡa murine inam kaigurata. Be kaigurata murine inam miakaua. <sup>7</sup> Be miakaua murine raukivivere. Be raukivivere murine wainuapaḡo. <sup>8</sup> Deḡoda inam yawasanidima ami waisumaḡe ta kena be ta morabana, inam raḡanine taumi tokare nam ko mia yabayababa, ibewa da taumi tokare dā Badama Yesu Keriso ko katai kauena. <sup>9</sup> Be deḡoda aitaḡo ḡarone inam yawasanidima nam ta kena, inam nam i verena. Baninama Bada Yesu inam baneginama na gewagewama ya noḡonoḡota poredina. Be inam baneginama tauna matanama ya pota be nuanama ya koana, aubainama inam yawasanidima nam ima noḡonoḡotidina.

<sup>10</sup> Yau bana, Mamaitua ya yokoemi be ya vinemina, vutuna aubainama yodi ko raurubu gurata da na ḡoanama ruvane nama ko miana, da banaga ta kiteḡi be ta kataie da taumi Mamaitua ya vinemina. Taumi deḡoda inam yawasanidima ko voiedina, taumi tokare nam airaḡan ami waisumaḡe ko beku. <sup>11</sup> Inam raḡanine taumi aubaimima Mamaitua tokare nuanama tabutabune mara matakedanama e kaiporena. Be taumi tokare dā Badama Tauwai yawasana na waiguyauma kenakena nonoḡinama nopone ko saḡana.

### *Riukaua kana matamatama*

<sup>12</sup> Taumi inam riukaidima kaite koya kataiedi be Bada na riukaue ko midimidi bagibagina. Be

yaḡoro taugu raḡan matabuna uma yabedima yà riuriu wainoḡotimina. <sup>13</sup> Taugu è noḡotina inam ya verena da taugu yà miamiae inam yabedima raḡan matabuna yà riuriu wainoḡotimina, be muriḡa da yà gurina. <sup>14</sup> Taugu è kataiena da taugu kaiteka yau raḡanima e tavatavana da yà gurina, baninama dà Bada Yesu Keriso nama ya riueguna. <sup>15</sup> Vutuna aubainama taugu yà rarau rubu guratana, baninama yà ḡoḡoena da taumi uma giudima matabudi ko ragaudi da nuemie, be raḡanine taugu yà gurina, taumi uma giudima kaite koya kataiedina.

<sup>16</sup> Tauma kè riuemina da tauda dà Badama Yesu Keriso ma rewapanina tokare e verau munaḡana. Uma giudima tauma nam nuamaie kei tubuḡidi be kama giugiuemina. Ibewa da tauma vutuna mataḡomimaie na borumama be na rewapanama kè kitana. <sup>17</sup> Inam raḡanine Tamadama Mamaitua Yesu ya kawa saḡe be na borumama ya utena. Dabudine bona dosinama marae ya dobi be ya riuna, “Inam tauna taugu natuguma nuaguma e paḡopaḡona, be taugu yàwai nuaverena tauna ḡarone.” <sup>18</sup> Be uma giudima raḡanine tauma Yesu mate oya babaune kè miamia be bona marae be ya yovona bea ḡomimaie kè vaiedina.

<sup>19</sup> Uma kauinama yai kataimai be kè katai kauena da peroveta boni aba a giugiuedina, inam matabudi riukaua. Vutuna aubainama taumi mate sibo peroveta adi giuma koyai sumaḡedi be koyai muriwatanedina, baninama inam giudima taumi nopomie maika kabe kodam dobu waikupikupine ti yanayana watanana naumeki da raḡantomtom, be raḡantomtom tau-

raḡaraḡan\* e tavana be e yanayanana, nama tokare nopomie e yanana. Be tauraḡaraḡan tauna vutuna Yesu. <sup>20</sup> Be mate ko noḡoti da girugiruminama porane boni peroveta nam nuedie giu ti tubuḡidi be ti giugiuedina. <sup>21</sup> Be nam airaḡan banaga mabidie tiwai perovetana, ibewa da taudi Arua Babau yai dokedi be Mamaitua aba ya vatovatodina, giudima nama taudi a vatovatodina.

## 2

### *Tauwai katakatai kaikaiyovudima tokare kovoḡe ta miana*

<sup>1</sup> Be Peroveta ḡesaudima kaikaiyovudima mate boni Israel nopone a miamiana. Be teneginama nama yodi tokare tauwai katakatai kaikaiyovudima nopomie ta maḡatara, be taudi moisiriḡa waikatakatai kaikaiyovudie tokare ta boru waideḡemina. Be Bada tauna vutuna ya kuvesidina, be tokare isanama ta bovia. Inam kedane taudime adi kovoḡama tokare tunidie ta boruna be ta guri makaina. <sup>2</sup> Be toitoi tokare adi ḡoanama kaidima waitunimamayagidima tai muriwatanedi, be yawasana riuriukauinama tokare tai mirana. Inam raḡanine banaga tokare giu gewegewedie riukaua kedanama tai giugiuena. <sup>3</sup> Inam tauwai katakataidima kaikaiyovudima tokare waigogo noḡotinama ta paḡo be taudi giu kaikaiyovudie ta raumanena. Inam banegidima Mamaitua boni ya siava

---

\* **1:19:** ‘Raḡantomtom’ inam Yesu na kaba verauma be ‘tau-raḡaraḡan’ tauna vutuna Yesu.

wainonoḡidina, be yodi taudi guri kenakena nonoḡinama tawai rabena.

<sup>4</sup> Baninama anea ko noḡotidi, avedi da taudi marae miemienidima be raḡanine gewagewa a voivoiena, Mamaitua yaḡoro ya pore dobiḡedina gienae. Be dabudine taudi yodi dom waitadi-wanawanane ta miamiana, be kovoḡa ta raber-abena. <sup>5</sup> Be mate dobu poranama\* ko noḡoti. Mamaitua banaga gewegewedima nam i yawasanidina, ibewa da tauna kabaita ya riupore be inam dobumama yai monu porena. Be didimana taurauguguyenama Noa taunaḡa yai yawasanina na vadama banegidima <sup>7</sup> mate. <sup>6</sup> Be mate Sodom be Gomora meagaidima ko noḡotidi. Mamaitua inam meagaidima ya gabu gorudi da kavudiḡa a kenana. Dabudine banaga yodi ta kita be ta kataie da gewagewa banegidima tokare ḡarodie nama ta tubuḡana. <sup>7-8</sup> Be Mamaitua Lot yai yawasanina, baninama Lot tauna didimana baneginama. Be tauna na banagama gewegewedima adi yawasanama miremiredima raḡan patapatanama ya kitekitedi be ya vaivaiedina raḡanine, tauna ei nuaboya kauana.

<sup>9</sup> Yodi tè katai kauena da Mamaitua waisumaḡa banegidima adi raurubue tokare tenegina ei yawasanidina. Be banaga nam waisumeḡidi Mamaitua tokare etara na raḡanie adi kovoḡama e utedina. <sup>10</sup> Taudi aitaḡa Bada na waibadama a riuriutuatuagaie, be tubuḡidima na ḡoanama miremiredima awai muriwatanedina, taudi

---

\* **2:5:** 'Dobu poranama' inam Adam na raḡanie ya naḡo da kabaita dosinama na raḡanie.

tokare inam kovoginama ta banavina. Be inam tauwai katakataidima kaikaiyovudima taudi debedima ya tora kauana, be nopodima moraba ya moġavuna. Be mara taumiendima tawai diboġidi be ta kunukunuredina. <sup>11</sup> Be anea taudi avedi da ai rewapana kauana, nam inam banegidima gewegewedima maika, be nam airaġan Bada matane mara taumiendima ti diboġidi bo ti kunuredi.

<sup>12</sup> Be inam banegidima taudi mara taumiendima adi rewapanama nam ti kataiedina, aubainama tawai diboġa be ta kunukunura yabayababana. Taudi a bua kaua be adi yawasanama musara adi yawasanama maika. Vutuna aubainama taudi tubuġa na ġoane ta voivoia yabayababana. Taudi tokare guri ta kita saġena maika musara ta vunugidi be tawai guridina nama. <sup>13</sup> Taudi banaga a voidi be awai nuatoitoina maesinama, taudi mate tokare tai nuatoitoina. Taudi adi nuavere kauama inam avedi da suare, be taudi yaġoro ta kani posa, ta tego bua be voia waimatawarewardima ta voivoiedina. Taudi taumi mate ko soisoi tenaġana raġanine, taudime ta kawa saġesaġe munagedi be tawai guyaguyauna, baninama taumi adi giuma miremiredima kowai beavaiedina aubainama. <sup>14</sup> Be taudi waiwaiwi tabu be tabu ta kita nuadiniedi be tawai kwinedina, be taudi raġan matabuna gewagewa ta voivoiedina, be nam airaġan tima sipesiperena. Be banaga adi waisumaġama vogwaġegwaġedima ġarodie ta menamena ġarorona da kabe adi ġoanama ta voidi. Be mate taudi waigogo na nuauyayama

debedima ya moḡavu kauana. Inam nama banegidima Mamaitua tokare e mutu ririḡidina. <sup>15</sup> Taudi keda didimaninama a gose pore be Beor natunama Beilam na voiama tawai muriwatanena. Beilam tauna na ḡoana kauama inam gewagewa e voie be damone maesa e paḡona. <sup>16</sup> Be musara donki tauna nam giugiuna, be inam raḡanine banaga maika ya giu ḡoma be peroveta Beilam na voia buabuae ya riutuaḡaiena da tauna nam nama sibo ya voia.

<sup>17</sup> Inam nama banegidima ḡarodie tokare nam yawasana ta banabanavi. Taudi adi waikatakataima kavakavanama be nam baniboruboruna. Taudi inam watutu tiwatiwanama maika, bo taudi maika ḡuva dobu e suma be sive e suvesuve waibabarina nama. Taudi adi gabuma inam waitadiwanawana vavaḡinama Mamaitua ya vokaukaue be e kenakenana, <sup>18</sup> baninama taudi rauguyaguyau giudima nam bani biribiridi be ta giugiu yababedina aubainama. Taudi tubuḡa adi ḡoanama miremiredima ta ḡoeḡoe kauedina. Be taudi ta ḡoeḡoena da tauwai sumaḡa vaudima inam yawasanidima miremiredima a gosegedina kabe ta voia munaḡedi. Vutuna aubainama ta menamena ḡarorona da taudi adi kwaroe kabe tauwai sumaḡa vaudima ta tikonidi, be yawasana a gosegedina kabe ta voia munaḡedi. <sup>19</sup> Taudi ta giu ḡaroḡaroro be ta riuriuna, “Deḡoda taumi koi muriwatanemaina, taumi tokare ami ḡoanama nama kaudima ko voiedina, be nam aba e tainuaraḡeraḡemi.” Be ibewa da inam tauwai katakataidima

kaikaiyovudima taudi ġomidima guri aubainama tawai yaragana. Baninama deġo yabanama ei bademina, taumi inam yabanama na yaragama koya tubuġana. <sup>20</sup> Be deġoda banaga vari verenama a vaie da adi yawasanama a vitaredi be Yesu Keriso a kataiena, be murine deġoda Keriso a mia tautaurie be yawasana miremiredima boni a voivoiedina ta voia munaġedina, inam raġanine adi yawasanama a gewagewa vavasagana nam maika noġone, muriġa da ai sumaġana. <sup>21</sup> Be verenama da inam banegidima didimana kedanama nam sibo a kataie. Inam ya verena da taudi kaite a vaie da a kataiena, be yodi yaġoro da Mamaitua na riuvasasagama babaudima ta miamia tautauriedina, inam tauna Mamaitua matane ya gewagewa kauana. <sup>22</sup> Be banaga giu uma a giugiuiedina inam a riu kauana, “Inam banegidima taudi maika daġadaġasi, taudi ta waġiro be waġirodima ta kanikani munaġena.” Be mate taudi maika bawa. Banaga bawa natunatudima upae tawai sigu kauedina, be raġanine barabarae ta tavatavana, taudi ta munamunaġana konokonoe topa aubainama.

### 3

#### *Bada ya sauga da e verau munaġana*

<sup>1</sup> Yau bana, uma yodi yau letama aniwai rabuinama ġaromie yà girugirumina. Uma letedima rabui nopodie taumi aba kaite koya katakataiena, vutudi taugu yà riuwai noġota munaġemina da taumi noġota veredima sibo debemie a kenana. <sup>2</sup> Taugu yà ġoegoena da boni



peroveta babaudima abaḡa a giugiuedina, vutudi taumi ko noḡotidina. Be mate dà Badama Tauwai yawasana abaḡa ya giugiuedina mate ko noḡotidina. Inam giudima vutudi boni apasol ḡaromie a rauguguyedina.

<sup>3</sup> Be yaba tenaḡa yà ḡoeḡoena da ko katai kauena inam uma, yodi raḡan damodie tauwai diboḡa ḡesaudima ta maḡatarana. Taudi riukaua tokare tai kwatekwateve be adi ḡoanama kaudima miremiredima ta voiedina. <sup>4</sup> Be inam raḡanine taudi tokare tai taraviremi be ta riuna, “Yesu ya saugana da tokare e verau munaḡana, be yodi tauna deḡo, wa? Boni dobu ya tubutubuḡe naumeki da yodi nam aba i tubuḡa rubuna, yaba matabuna tenegina nama e kenakenana. Tauma tamatamaima nama boni ai raba rereḡa da a gurina.” <sup>5</sup> Be inam banegidima taudi inam kaudima boni a tubutubuḡana matabudi a bovidina, avedi da a kataiena da boni Mamaitua riune mara ya tubuḡana, be mate tauna riune upa kivine dobu ya maḡatara be e kenakenana. Be taudi ta voivoia munaḡedina da taudi kabe nam ti katakataie. <sup>6</sup> Be mate muriḡa inam upanama tenegine Mamaitua dobu yai monuna. <sup>7</sup> Be inam riunama tenegine Mamaitua ya riuna da mara be dobu tokare kaie e gabu gorudina, etara raḡanine. Inam raḡanine Bada banaga nam waisumegidi tokare e kawa gewegewedina.

<sup>8</sup> Be yau bana, uma ko noḡoti, Bada ḡarone modi 1 tausand inam maika raḡan tenaḡa. Be raḡan tenaḡa inam maika modi 1 tausand tauna ḡarone. <sup>9</sup> Bada tauna ya saugana da e verau munaḡana, be yodi tauna nam verau aubainama

imawai riuriu koana, banaga ḡesaudima ta riuriuna maika. Ibewa da tauna ewai raba nuetauna, baninama e ḡoeḡoena da banaga matabudi sibo adi gewagewama a kuvesidina, be nam aitu sibo gienae ya naḡo. <sup>10</sup> Be Bada na kaba verauma raḡaninama e verauna inam maika tau-danedanene, tauda nam te kataiena airaḡan e verau. Inam raḡanine gugura dosinama nopone mara tokare ta samoana. Be dobu nopone yaba matabudi tokare kaie e gabu gorudi be tai kavedina.

<sup>11</sup> Be yodi koya kataie da yaba matabudi tokare ta samoana. Vutuna aubainama taumi banaga nema maika kitemima sibo koya tubuḡa? Taumi sibo banaga babaumima, be Mamaitua na ḡoanama ruvane nama sibo koya miana. <sup>12</sup> Be Bada na kaba verauma raḡaninama taumi ko raberabe be Mamaitua na ḡoanama ko voivoiedi. Inam kedane tauna na kaba verauma raḡaninama tokare ko taitupona. Be inam raḡanine mara tokare kaie e gabu gorudi be ta samoana. Inam raḡanine dobu be nopone yaba matabudi tokare kai menane e gabu gorudi be ta nuagudaguda be tai kavedina. <sup>13</sup> Be Bada na saugama ya boruna da tauna tokare mara vaudima be dobu vaunama e voiedina, inam dabudine tokare didimana banegidima ta miana. Vutuna yodi ta raberabena.

<sup>14</sup> Be yau bana, taumi yodi kowai rabana aubainama ko raurubu gurata da yawasana miremiredima ḡaromie nam Mamaitua e kitedi be ei wavumi, avedi, ibewa da subae tauna mate sibo koya mia tenaḡana.

<sup>15</sup> Be ko noḡoti da Bada ewai rabanuetau be ewai rauriemina da taumi ko kuvesa be ko yawasanana aubainama. Uma yabedima teneḡidima turadama Pol Mamaitua na nuauyauyae ḡaromie ya giruma be ya giuedina. <sup>16</sup> Inam nuauyauyanama teneḡine leta ḡesaudima nopodie inam giudima tauna ya giuedina. Inam letedima nopodie yaba ḡesaudima ya girugirumidina a piripiri kauana, nam anikatakataiedi. Be banaga gewegewedima taudi Pol na giuma riuriukauidima ta vitaredi be kaiyovue ta rarau guguyena. Be teneḡinama nama taudi Mamaitua na giuma ḡesaudima girugiruminama porane ta vitaredi be kaiyovue ta rarau guguya yababena. Vutuna aubainama taudi adi damonama guri kenakena nonoḡinama tokare ta banavina.

*Pita na giuma damodamodima*

<sup>17</sup> Yau bana, inam kaudima yodi yà riuriu wainonoḡimina da ko katai kauedina. Vutuna aubainama taumi yodi ko rabe kauemi da inam tauwai katakataidima kaikaiyovudima nam tai kedadoka waigewemi, avedi. Taumi kaite ami waisumaḡe ko midimidi bagibagina, be yodi tokare nam ko beku. <sup>18</sup> Tauda dà Badama tauwai yawasanidama Yesu Keriso na raukiviverema nopomie e moraba be tauna ko katai kauena.

Tauna vutuna ḡarone neneḡara yodi be nokoi, nama ta kena nonoḡana. Inam riukaua!

**Vari Verenama**  
**The New Testament in the Dawawa Language of**  
**Papua New Guinea**  
**Nupela Testamen long tokples Dawawa long Niugini**  
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 11 Nov 2022 from source files dated 9 Oct 2020

9b8bda32-db42-5be3-9d24-4e4a5d5f65b2